



Tour de Suisse 2017 - partenza davent da Zernez

Ils organisaturs da la Tour de Suisse gnissan dal 2017 gudent darcheu in Engiadina cun ün'etappa da la cuorsa. Analog a l'on 2013 füss l'arriv la mità da gün 2017 a La Punt-Chamues-ch e la partenza il di davo a Zernez. La cumischiun da turissem sustegna quist arrandschamaint chi procuress per varsaquantas pernottaziuns a Zernez d'urant ün temp cha'ls hotels nu sun amo occupats uschè ferm. Implü pudess il Cumün da Zernez rinforzar sia posiziun sco lö attractiv per occurrenzas da velo. La suprastanza cumünala es da l'avis cha la partenza da la Tour de Suisse maina ün augmoint da valur pel Cumün da Zernez e sustegna l'organisaziun da quist arrandschamaint.

Sanaziun totala da la via Davo Röven

La via da quartier Davo Röven fin Ospiz a Zernez sco eir tuot l'infrastructura suot terra sun in ün fich nosch stadi. I vegnan müdadas oura las lingias dal provedimaint d'aua, d'aua suos-cha, d'electric e da l'iglüminaziun publica. La lavur da planisaziun es gnüda surdatta al büro Liun Quadri a S-chanf. Implü sun gnüts definitivs ils prossems pass per cuntinuar cun la procedura da submitsiun. Id es previs da sanar la via d'urant la primavaira/stà 2016, eventualmaing eir in duos etappas sur duos ons.

Rimplazzamaint dal s-chodamaint da ziplas

Il s-chodamaint da ziplas in Cul a Zernez nun accumulscha plü las pretaisas chantunalas per mantgnair net l'ajer e sto gnir sanà. Per pudair proseguir cun la calculaziun da cuosts dal proget da rimplazzamaint dal s-chodamaint da ziplas, s'ha stuvü installar ün sistem per masürar la prestaziun da la rait dal provedimaint da chalur. L'incumbenza es gnüda surdatta al büro d'indschegners Torsten Hartmann a Bonaduz.

Radunanza cumünala dals 28-04-2016

Causa mancanza da tractandas es gnü decis da strichar la radunanza cumünala dals 28 avrigl 2016. Quista data d'eira gnüda fixada provisoricamaing. La prosma radunanza cumünala ha dimena lö in lündschdi, ils 27 gün 2016 cun la preschantaziun dal rendaquint 2015.

Restructuraziun Center Muglinas Susch - surdatta da lavurs

L'anteriura chanzlia cumünala a Susch sco eir l'abitaziun sül plan sura vegnan tuttas a fit a partir d'avuost 2016 da la scoula da pedagogia curativa a Giuvaulta. In quel connex han da gnir fats divers adattamaints vi da l'abitacul. Las incumbenzas sun gnüdas surdattas a las firmas cun l'offerta la plü favuraivla: lavurs da tagliar betun a la H.U. Diener AG, Maloja; lavurs da müramer a la firma Andri Margadant, Susch; lavurs da pittur a J. Neuhäusler, Susch; lavurs da cuvrafuonds a Pfister Professional AG, Cuaira, lavurs da falegnam a Peider Müller, Susch; lavurs da sanitari a Tung SA, Zernez e lavurs d'electricer a la Electra Buin SA, Scuol.

Seguondas abitaziuns - proseguimaint in chosa zona da planisaziun Zernez

Davo il "schi" per l'iniziativa da seguondas abitaziuns als 11 marz 2012 es uossa, daspö ils 1. schner 2016, in vigur la nouva ledscha federala per seguondas abitaziuns. Sün quist "schi" per l'iniziativa vaiva l'anteriur Cumün da Zernez relaschè als 18 gün 2012 üna zona da planisaziun. Quista zona serva a l'examinaziun e per fixar masüras per la promoziun da prümas abitaziuns e per manisar la fabrica da seguondas abitaziuns. Culla nouva ledscha da seguondas abitaziuns es quist böt uossa ragiunt. La suprastanza cumünala ha decis d'abolir la zona da planisaziun chi vala per las fracziuns da Zernez e Brail. Uschè vain pussibilità da fabricar oura chasas existentas, chi nun han restricziuns, eir sco seguondas abitaziuns ed uschè sustgnü l'intent da mantgnair la substanza dals abitaculs i'l minz dal cumün.

Provedimaint electric - uordens per la fracziun da Zernez

Per proseguir cun structurar il provedimaint electric da la fracziun da Zernez, chi'd es in possess cumünal, sun gnüts elavurats ils uordens bsögnaiels. Tals suottastan a la ledscha cumünala d'energia, a las disposiziuns executivas ed a la ledscha cumünala dal provedimaint electric. Ils uordens e las tariffas pel provedimaint electric da la fracziun da Zernez sun gnüts acceptats ed aintran in vigur retroactiv süls 1. schner 2016. Quista decisiun lascha inavant avert al Cumün da Zernez la pussibilità da vender plü tard la rait electrica da la fracziun da Zernez a terzs.

Management d'infrastructura - part immundizchas

Da primavaira 2015 d'eira il büro d'indschegner Darnuzer AG a Tavo gnü incumbenzà da s-chaffir üna survista dal stadi da tuot ils provedimaints cumünals. D'utuon 2015 es lura gnü preschantà a la suprastanza cumünala il prüm sböz dal provedimaint d'immundizchas. In seguit es quist sböz gnü surlavurà e la prüma part, chi pertocca las fracziuns da Lavin e da Zernez, po uossa gnir realisada d'urant il 2016. Sur dals müdamaints in connex cul ramassamaint da las immundizchas vain la populaziun infuormada a temp ütil.

Nouv uorden per l'utilisaziun dal bogn da famiglia

L'uorden per l'utilisaziun dal bogn da famiglia a Zernez es gnü adattà a las pretaisas da sgürezza d'hozindi. Il müdamaint principal es cha uffants fin ot ons das-chan ir a bogner sulets be sch'els han accumul il test da nodar chi vain spüert i'l bogn da famiglia.

Secretariat per las gestiuns tecnicas

La suprastanza cumünala ha decis d'augmentar il pensum dal secretariat da las gestiuns tecnicas e da la gestiun forestala. D'urant il prüm on davo la fusiun dals cumüns s'ha badà cha'l secretariat da quistas secziuns es suotdotà. Per surtour quist pensum da 25% es gnüda ingaschada Karin Stecher dad Ardez. Ella d'eira la secretaria da la gestiun forestala Macun. Quista gestiun es gnüda scholta sülla fin da l'on 2015 ed integrada illas gestiuns dals cumüns da Zernez e Scuol.

Proget d'interramaint da la lingia da 16 kV da las OEE SA tanter Zernez e Brail

Las Ouvras Electricas Engiadina OEE SA han inoltrà al Cumün da Zernez ils precontrats chi reglan ils drets da passagi da la nouva lingia da 16 kV sün parcelas cumünalas tanter Zernez e Brail. La suprastanza ha acceptà ils precontrats uschè cha tals pon gnir suottascrits.

Deponia Sur Röven a Zernez

D'utuon 2015 as vaiva laschè elavurar ün concept per renatüralisar l'anteriura chava da gera in Sur Röven a Zernez. La chava vain uossa sco prüm implida sü, vuol dir ch'ella po gnir dovrada sco deponia cumünala per material da s-chav net. La deponia vain manada e gestida tras il cumün. Ils respunsabels operativs han preparà ün reglamaint ed ün uorden da gestiun. Illa deponia han lö raduond 15'000 m³ material da s-chav net ed i's fa quint cun ün rechav net da raduond 80'000 francs sur la dürada da duos fin trais ons cha la deponia sarà averta. La suprastanza cumünala ha acceptà il reglamaint e l'uorden da gestiun ed implü deliberà ils credits necessaris per l'investiziun e la gestiun da la deponia.

Delegaziuns pel Cumün da Zernez

Sco rapreschantant pel Cumün da Zernez illa gruppaziun d'interess dals cumüns pitschens dal chantun Grischun (IG Kleingemeinden GR) es gnü reelet Linard Martinelli da Lavin. In quista gruppaziun es el commember da la suprastanza. Implü es Linard Martinelli gnü reelet sco commember illa cumünanza da lavur dals lös muntagnards in Svizra (Schweizerische Arbeitsgemeinschaft für die Berggebiete SAB).

Stab da crisa cumünal

In seguit al müdamaint dal cumond da pumpiers süls 1. schner 2016 faja dabsögn d'adattar eir il stab da crisa cumünal (Gemeinde-Führungstab). Andri Thom es gnü elet i'l stab da crisa in sia funcziun sco cumandant da pumpiers. Il chanzlist Corsin Scandella ha surtut la funcziun sco secretari i'l stab da crisa.

Cas Engiadina Recycling / Cumün da Zernez - Examinaziun tras la cumischiun sindicatoria

Illa radunanza cumünala dals 1. settember 2015 d'eiran gnüts fats rimprovers massivs invers il cumün cun suprastants, impiegats e cusgliaders externs in chosa Engiadina Recycling e la dumonda d'augmoint da prestaziun da forz'electric in Sosa a Zernez. In seguit as vaiva incumbenzà a la cumischiun sindicatoria d'examinar ed analizar il cas. La suprastanza cumünala ha tut cogniziun dal rapport fich detaglià da la cumischiun sindicatoria e decis d'executar ils puncts manzunats aint il rapport.

Restorant Center da Sport – surdatta da lavurs

Dürant la prümavaira 2016 vegnan fats adattamaints vi dal restorant Center da Sport. Las lavurs da müraeder e da lovaplattinas sun gnüdas surdattas a la firma René Hohenegger Sarl, Brail.

Sezzüda d'infuormaziun cun la Corporaziun da vaschins

La suprastanza cumünala ha invidà a la suprastanza da la Corporaziun da vaschins sco eir als commembers da la direcziun operativa ad üna sezzüda d'infuormaziun. I s'ha orientà vicendaivelmaing e barattà infuormaziuns sur da differents progets e temas chi sun importants eir pels vaschins. Quista sezzüda cumünalva dess in avegnir avair lö üna vouta l'on.